

## Moeëre en Moerinne:

Wae as redaksie hadde geprobeerdj oom weer ein Kwakel vol te sjrieve. Ut is mesjien neet allemaol waor gebeurdj, mer waal sjoëen vurzônne. Wae gaon waal met de tied met, want met allemaol dêt gecomputeriseer môte waal met aan of ze wilt of neet. Wae hadde namelik ein sjoernaliste bie de redaksie, diej alles ut hieël jaor door bie hultj en inveurdj in heure computer. Ein paar waeke veur de vastelaovendj, printj ze den alles oet en kan ut vurtiaalwèrk beginne. Ut is mesjien neet allemaol good gesjreeve, mer dur verangere auch zoëveul weurd in oos plat, dêt dêt haos neet mieër bie te haoje is. Wae hope aevgood dêt ut ein bietje laesbaar is. En dêt djer der veul laesplezeer aan moogtj belaeve.

Van dees gelegenheid make wae auch gebroeëk oom Prins Frank en Prinse Judie eine fijne vastelaovendj toe te winse, same met de hieël Eller bevolking.

Met ein drie maol ALAAF!



Kwakel

Vastelaovendj 1990:

De jaore tachtig hubbe wae der noe opzitte.  
Jaomer genoeg neet zoonger vurlees. Aafgeloupe  
oktoeëber verlore wae Jo van Bekkers Sjeng.  
Oze Aod-Prins en lid vanne raad van elf.  
Wae zulle altied aan ziene geweljige inzet  
blieve dinke.


Te telle vanaaf 1980 hubbe wae nao Prins Hub  
vanne Baars, Har vanne Tup, Jan van meester Zef,  
Jo van Bekkers Sjeng, Hub van Sjr, Ton van Sjang  
van Doeër, Jan van Lemme, Wim van Bekkers Sjeng,  
Pietje van Nol, John van Lewie, noeë Frank van  
Tjeu van Hoke en zien Prinse Judie, de zevendje  
Prins oet ut volk, de ieërste Prins dae auch  
jeugd prins is gewaestj in 1977. De jeugd weurdj  
aangeveurdj door Marco van Wilke vanne Vin en  
Monique van Hub van Sjr. Wie wae al gezeen  
hubbe rieëk gezengeldj met vastelaovesblood.  
Waat de jeugd betreftj moge wae absoluut neet  
klage. De lêste jaore hubbe wae gezeen, dêt de  
traditie steeds baeter biej de joongere aan-  
sluutj.

As wae truk kieke, zeen wae tieën jaor woë in  
de vastelaovendj good geboordj heet.  
Hoeëgte puntje woore der zat. Te veul oom op  
te numme, want wae zoeëje de de eine of de  
angere te kort doen, as dêt wae der hiej inkele

oet zoeëje hoole. Alle aktiviteite die der  
zeen gewaestj, zeen ofwaal vurbaterdj of  
opnoeëw opgezatte. En dao is hieël, hieël veul  
werk veur gedaon: neet allein door de carnavals-  
vereniging met de Prinse, mer veural door de  
minse, diej in de comite's metgedreidj hubbe,  
de minse diej wèrk hubbe gedaon of diej met  
eige ideeje aane Boontje aovendje enne optocht  
metgedaon hubbe. De minse diej as publiek aan-  
wezig zeen gewaestj; minse allemaol bedanktj  
veur de steun in dees jaore.  
Want de carnavalsvereniging  
kan neet allein blieve  
besaon veur de lol vanne  
leje. De carnavalsvereniging  
besteit veur alle minse van  
ut d'röp, diej opt dein op  
dangere meneer ut vastelaovens-  
fieëst in standj wille haoje.  
Wae as vereniging wille ut  
wèrk blieve doen, mer wae  
raekene op de ieërst plaats  
op euch! Blijftj met doen  
wiej altied, den weurdjtj de  
vastelaovendj van 1990 en auch  
dae vanne jaore dernao weer good!



DE VORST



Bèste Moeëre en  
Moeërinne

Ich Prins Frank I hub de  
ieër om ein klein veurwoord te doon.  
Ieërst wil ich veur degene die neet op ut  
Prinsebal woore, mich nog efkes veurslèlle.  
Ich bin Frank van Hoke (Stals).  
Zoon van Tjeu van Hoke Door en Mien van Tina  
van Kessels.  
Ze hubbe mich gevoonje op 19 juli 1964.  
Ich bin de ieërste prins dae as jeugdprins in  
1977 al heet kônne oefene.  
Ich zal probere oom Ell drie daag lank op ziene  
kop te zètte. Met de steun vanne Raod en met  
oos aller bèste kapel en nuteurlik met de hieël  
Eller bevolking. (Groeët en klein, joonk en aod)  
En veur Prinses Judith moot dèt gein probleem  
zeen. Miene veurganger Prins John en Prinses  
Ank is dèt aardig good gelöktj.  
Ich zal probere oom ut nog erger te make.  
Zoeëdèt de minse nao die daag kônne zegge:  
"Wie kan ein boore dörp as Ell in drie daag  
zoeë vurangere."

Tenslotte wil ich Prins John en Prinses Ank  
hêrtelik bedanke veur ut aafgeloupe jaor.  
Ich hoop dèt gae as Eller minse auch dit  
jaor de carnevalsvureiniging ein werm hert  
zultj toedrage en mich zultj wille steune  
zoeë as djer anger jaore auch gedaon hubtj.  
Ich weit zeker, dèt den de vastelaovendj 1990  
weer zal slaage.  
Ich gaon die daag noeë regere oonger mien

MOTTO:



BULKTJ DER UCH  
NOG EINE

IN DE ORDE VAN UT BULKAOTOOKE

## Moeërebuuk en Moeërinnekes

Ich bin zenewechtig mer auch bliej  
want ich staon hiej veuraan  
inne riej.  
Met mien prinses aan mien ziej.  
Ich bin zelf waal ein bietje klein  
mer dêt finj ich zelf fijn.



wae gaon der dit jaor ins good  
tegeaan,  
auch al moge wae neet aane tapkraan.  
Straks geit der aevegood nog eine  
groeëte cola aan.

Met mien prinses Monique aan mien ziej  
zeen wae erg bliej. Dêt wae dit jaor  
weer flink gaon hosse en danse  
en mesjien met de ein of anger sjanse.

Gae bliestj dit jaor ins neet op eur kontj zitte  
en neet op dae computer zitte te tikke.  
Wae make die drie daag flink lol  
en sloeëte as lêste mesjien bieje Siem of Nol.

Ich gaon sloeëte met oos motto  
waat gae allemaol motj kinne toeëte:  
"Of wae noe voetballe of ich trôm.  
Dae neet met duuit dae is stôm."

Alaaf!

Alaaf!

Alaaf!

Jeugprins MARCO II

Jeugdprinses MONIQUE



## Bêste Moeëre en Moeërinne


Dao is eine tied van  
kome en dao is eine tied  
van gaon. De tied van gaon is  
noeë veur mich gekoome. Ut aaf-  
geloupe carnavalsjaor waas ein kort  
mer krachtig jaor veur mich en  
mien Prinses Ank. Het waas auch ein  
jaor waat wae noeëts zulle vurgaete, want  
ut waas formidabel. Asse zuuêst waat met die  
daag allemaol kan in ut Moeërelandj, dêt grenstj  
aan ut ongeluufelikke. Daoroom wil ich uch minse  
van Ell hertelik bedancke, veur de steun die wae  
van uch hubbe gehadj. Noeë wil ich auch vanne  
gelegenheid gebroeëk makè oom de toekomstige  
Prins Frank I en Prinses Judith eine gooje  
vastelaovendj toe te winse.  
Dêt ze net zocë as wae eine fijne vastelaovendj  
tegemeet moge gaon.

Moeëre en Moeërinne nogmaals hertelik bedanktj,  
onger Motto:

Bliestj neet staon, laot gaon, laot gaon,  
Aswoonsdig is ut gedaon.

PRINS JOHN I

PRINSES ANK





# XX Derckx

Staalbouw  
Derckx b.v.  
Nederweert

ugge PARTNER EN  
spesjalist in  
staalkonstruksies

SONGER DE HULP, DE SPONSERING  
EN DE KWALITEIT VAN DIT BEDRIEF  
HAJE WAE NOËTS ZONNE SJOËËNE  
PRINSEWAGE GEHATJ.




det geldj ouch veur  
Loeënbedrief  
Harry v.d Looy  
dae zien Loëeds  
ter besjicking  
stéldje.

## De Sjoëëne Slaopster:

De Prinsereceptie van Prins John en zien Prinses Ank waas weer good geslaagd en reuze gezellig gewaestj. Toen inne kleine eurkes zoëë oom ein oor of veer, eederein op hoeës aan waas gewaggeldj begoste Nol en Idy de boel mer ins op te ruime. Mer toen Idy aane w.c.'s woëëj beginne, kos ze neet vroet, want dao waas ein dames w.c. gesloote. Ze sprong al ins omhoeëg oom door ut ruutje vanne deur te kinne kieke. En zaag dao tot heur verbazing eemes ligge. "Oh Nol," reep Ietje, "koom ins gauw, ich krieg diej w.c. neet oope en dao liktj eemes. "Wacht mer," zeet Nölke en begos wie eine gek oppe deur te boonke. Hae reep al ins "Is dao eemes?", mer niks hé, gein teiken van laeve. Den mer de deur oope gebrooke, zeet Nol. "Doe best waal gek," zeet Idy, "Stel dich veur dët dao eemes neet good gewoore is en dae liktj dao waat den?".

Vrouw, zeet Nol,  
"Lik noeë neet zoëë te lemmeteere. Ich kan heur dao toch neet laote ligge." Nao ein poeës gemertel,, haaj Nol de deur oope, hae kiektj, kiektj nog ins en zeet toen ein paar weurd, diej wae hiej neet kinne aafdröke. Ietje kiektj ins euver de sjouwer van Nol. En kriegtj de slappe lag Hie hieh hieh!!! Zaat mich dao oppe dames w.c. in deepe slaop Thieuke van Miet. Nao gët aan hum gesjuddeldj te hóbbe, kwaam der bij zien positieve. En soonger veul weurd is der toen mer op hoeës aan getrokke. Mer waat wae oos noeë aafvraoge, waas Thieuke zoëë door de slaop euvermandj, dët der neet mieër kost zeen op welke w.c. hae ging zitte? Zoonne Thieuke toch!!!!!!!



Vacantie sores:

Mia en Sjeng ginge nao Oeësteriek op vecantie.  
De hieël waek van te veure waerdje al koffers  
ingepaktj, oom mer niks te vurgaete.  
Smaondjes smurges moste ze al vreug aane statie  
zeen. Woeë de bus heur van oet Wieërt nao heur  
vekantie bestumming zoeëj bringe.  
Ze staon dao veur in te stappe en waat is heur  
euverkoome? Jao, gea raodj ut al, ut koffer  
sting nog in Ell.  
En waat der toen onger elkaar  
is gesprooke, dao wete wae  
niks van.



\*\*\*\*\*

RA RA RA ? ? ?

Vekantiegangers!!!!!!  
Ankie en Peter zeen auch "mêr" veur drierj mondj  
op vekantie gewaest.  
Ze zooge veel Nieuw  
veel Zee  
veel Land.

Rara woeë zeen diej gewaestj?

\*\*\*\*\*

Meistro Jan!!!!!!

Dit jaor nog neet, mer volgendj jaor zal ooze  
Vorst Jan aane carnavals optocht veurop gaon.  
Hae zal den de accordeon bespeule, en de hieële  
raad van elf zal der in polenaise achter aan  
gaon. Door de laevendje muziek zal de deilname  
aane optocht vanne bevolking toenomme. Waat  
zulle de carnevalsvureiniginge inne omtrék  
jeloers zeen op zonne vorst. Mer dêt maag auch  
waal, want hae oefendj zich noeë al de vingers  
blauw.



\*\*\*\*\*



Laotj uch ins Lekker bieje  
eur puit pakke  
door: Wies van Hover  
Rea Smolenaars  
en Toos Mennen

Zitte eur hoan  
neet good of inne weeg  
den nao Tiny




As eur bieestje  
get mankeerdj,  
gaotj den vlot nao  
ôs dierekliniek.

## Ein Super Vergissing:

Op eine gewuëne doordewaekse daag, most Harie, want zoeë haetj dae mins van dit verhaol, nog gauw efkes nao de booreboontj, veur ut ein en ut anger. En omdêt de booreboontj allein mer veur de middig ope is tot 12 oor, most dêt auch nog get vlot gaon. Och dinktj Harie ich pak mer gauw efkes eine auto, dao bin ich zoeë met op en nieër gewaestj. En omdêt dao gewuënlik de auto's veur ut griepe staon, waas dêt gein probleem. Zoeë gezagtj, zoeë gedaon. Harie staptj in de ieërste de bèste auto en riedj weg.

Mer neet wiet, want aan Frits van An begintj de auto te stottere, en oppe door sjeidje der oet. Ut gaas op bromtj Harie in zien eige. Mer neet getreurdj, gauw omgesjakeldj op benzien. Mer inne gang zuut Harie dêt der auch neet veul benziem mieër inne tenk zitj. Och dinktj der ich koom toch inne buurt vanne benzien poomp. Dêt hub ich inne gang. Biej de boontj angekoome waerdje alles ingelaaje waat Harie tekort kwaam. Doe bèst nog net oppe tied, zeet Sjaak tege hum. Want ich haaj de sleutel al gepaktj, wiej ich dich zaag aankoome. Jao, zeet Harie tege Sjaak, de auto meindje mich nog te kloeeëte, mer ich hub ut nog net gehooldj. Noe nog gauw efkes tenke, en den gaon ich auch aete.

Hae de weeg euver nao Heemels De dop al zelf losgedreidj, want dêt most vlot gaon. Want Harie haaj vrieëte hoonger. Goeëj hum mer vol met diesel zeet der tege Heemels, den kônne wae der weer ein poës tege. Dêt waerdje den auch gedaon. En Harie ging weer richting heivers. Mer ut beveel hum niks wiej dêt der heivers reej, ut waas presies of woeëj de auto neet mieër. Hae stotterdje en deej toch gek, totdêt der weer biej Frits van An waas.



En dao sting de pöngel weer stil. Jao mer dinktj Harie, wie is dêt noe meugelik, waat kriege wae noeë. Ich hub toch net getenktj, dao kan ut toch neet aan ligge.

Hae begos ins hieël deep nao te dinke. Nao ein puuëske dinke en ongerhandj gêt minse om hum haer, kwaam der drachter, dêt ze in eine Gaas-Benzien auto geine Diesel kinst tenke. Och vurrek zeet der, ich meindje, dêt ich den angere auto biej mich haaj. Dae luptj namelijk op Diesel. Och Harie vurgisse is minselik!!!!

\*\*\*\*\*

## Van Huuëre Zègge:

Ieërst eine auto gekochtj!

Hoeës gebowdj!

Getrouwdj!

Dao nao eine spikslintjjer noeëwe moter gekochtj!

En noeë Prins gewoore, woeë zoeëj der ut van doon?

\*\*\*\*\*

Wis djer al....

Dêt Sjang sinds dêt der oetgesjeidj is met waerke, lieëlik onhenjig is gewoore.

Dêt Sjaek van Linje dêt waal fijn vindj, want noe maag der swoonsdes saoves veur Sjang invalle opt kiene.


Dêt Sjaek den waal ein stök sjokolaat met mô numme veur Martha.

Dêt Mia ein gooj sjoernaliste is veur dees gezèt, want ze hultj ut hieël jaor alles biej oppe computer en printj ut noeë allemaol oet.

Dêt Ut kèrkbestuur eine laevendje gezonmeier heet.








DET ÔZE TUMMERMAN  
zoeë good waas

WIEL  
BEURSKENS

VEUR fieëste  
en kampieëste  
nao ôs  
gemeinsjapshoes



ELLENHOF



Bindjer nog  
neet net  
genôg?

den nao

"JEANNE"

Geboortegolf in Ell?


Aafgezeen vanne veurspoedige geboorte gruij van ut aafgeloupe jaor, hubste kans dêt ut jaor 1990 auch ein vruchtbaar jaor zal waere. Dit dank zij Jos van May van Sjur. ( Hé, Hé ) Noeë motj gae dit neet vurkieërdj begriepen. En dinke dêt dae Jos dao veur mot gaon zurge. Nae, nae, hae leutj dêt hieël netjes euver, aan de partners van die dames, diej moeder wille waere. Ingewikkeldj hé? Mer dêt zitj zoeë. De fanfaar diej is ut aafgeloupe jaor, zoeë as ger waetj op concours gewaestj en met succes. Noe sjientj ut, dêt de dirigent Leon Adams zich ins heet laote ontvalle, dêt de dames toch a.u.b. neet in gezeegendje staot zoeëje geraake tiedens de veurbereidinge op ut concours. Want as dêt zoeëj gebeure, den kost ut zeen, dêt bie de oetveuring in Kerkraade, men waal ins met halve "vrouw"kracht most speule. De hieëre partners hubbe zich den auch netjes aane geboortebeperving gehoaje. Mer dêt ut zwaor waas gevalle bliektj waal, want naodêt men trök waas gekieërdj oppe thoeës basis en der worde met lof waardje gesprooke, vroeg veurgenumdje Jos ut woord. Auch hae haaj waarderendje weurd veur de geleverdje prestatie. Mer zoeë vroeg der aan de hieër Adams: "Is ut noeë mesjien geoeërloufdj, dêt wae der veur zörge, dêt ut de fanfaar inne toekomst aan jeugdige lede neet zal ontbraeke? Zo ja den zal ut aan oos neet ligge, dêt oos dames diej speule bie eur fanfaar, binne noeë en zoveul tied, de geneugte van ut moederschap moge smake. Ich hub gesproke!". Waat zulle Juli, Augustus, spannendje maondje waere, veur de fanfaar, dinke wae.





Is eure auto eine  
groëte zoeplap?  
**garage Hemels** heet  
eine gooie tap.

stief wiej ein  
hout.  
laotj ug den mer  
ins knaetje bie j



BEEKMAN EN JEURISSEN




Plezeer veur  
groët en klein  
mèt ôze  
amusements-  
specialist

"KEPPER"

De Angstkreet Van Frank:  
=====

Frank en Judith ginge trouwe.  
Mer zoeë as gebroekelik mot  
der den gêt angevange waere.  
Mer oomdêt ut hoeës nog neet  
klaor waas, haaj zich zien  
zuster suf geprakizeerdj, woë  
ze hum met kost pakke. Efkes  
veurdêt der zien trouwpak en  
sjoon ging aandoon, kreeg ze  
eine inval. Toen Frank inne  
kerk in Hensel (vanwege de  
brandj haaje ze motte oet  
wieke) oppe knieje ging zitte,  
toen begoste alle  
aanwezige gêt te giegele. Waat  
haaj zien leef zusterke noe  
gedaon? Ze haaj hum met ein  
stift zoeë groët as ut kost  
"HELP" onger de sjoon  
gesjreeve



\*\*\*\*\*



Wis djer al.....

Dêt ut de mooders van vreuger neet mieër zeen.  
Dêt ut auch de trouwe thoeszittendje vrouwe  
neet mieër zeen.  
Dêt Leny van Huub van Sjir auch zoeë ein is.  
Dêt diej kermisdinsdig auch allein nog laat  
bie j Nol waas.  
Dêt de K.P.J. de Janse Baggeband haaje oetge-  
nuuidigdj.  
Dêt ze dêt auch geweete hubbe.  
Dêt der toen veul inne zaal dorst geleje hubbe.  
Dêt Siem en Nol nog geine bak beer in hoeës  
mieër haaje dae aovendj.  
Dêt ze den waal ins angere kal in ut dörp kriegst.  
Dêt aane kerk binnekort ein klein bultje bie j  
kumtj.  
Dêt de bökskes vanne geiteclub op waereldj diere  
daag vurkochtj zeen.


Ut Surf woonjer:

Siem dae kost vanwege zien noeëw bedrief, dit jaor neet met op vekantie gaon. Waetste waat dêt der zag tege Corine, ich koup mich de surfplank van Cleo. Den kan ich as dêt ut op dinsdig joeën waer is, nao de grindjgaate gaon. Zoeë gezagdj, zoeë gedaon. Zoeë as djer allemaol waetj, haaje wae eine pracht van eine zomer, en alle jong luuj die efkes tied haaje, looge te zonnebaaje aanne strenj vanne grindjgaate. Zoeë auch dae daag dêt Siem Arriveerdje met zien surfroeëtrusting. Hae zoeëj waal ins ein demonstratie surfe weggaewe. Met veul bravoer oppe plank, dao joog der euver ut water, as of der Stefan vanne Berg nog wat kost lieëre. Siem ging steeds verder weg en eederein zokdje weer onger oet oom nog get aan te branje. Nao ongeveeër ein oor vonj Corine ut toch waal lang doore, ieër Siem trök kwaam. Eederein tuurdje ins euver ut water, mer geine Siem te zeen. Wiej is dêt noeë meugelik, dae zal toch neet ongergeganje zeen. Eine vanne strandjgaste haaj eine verrekierker bieje zich en dao nog mer ins rondj gekeeke. En jaowaal, aanne euverkantj dao sting Siem. Gein zuchtje windj, dus kost der neet mieër trök euver ut water met die kl.....plank. Van leeverleej is Corine mer inne auto gestaptj. En is hum met dae hieële kraom dao gaon oplaaje. Corine kinendje zulle der waal ein paar gekruudje weurd gevalle zeen. Mer of Siem zich dao get van aan trektj???????????



ein mikske,  
bruëdje of  
gebekske,  
gezondj en lekker  
van oze eige  
WERME BEKKER!

de taxi veur  
eur vieë,  
laotj ze rieje  
door Wiel Geenen



te krap, te groeët,  
te wied of veur  
ein noew Pekske  
modjer bieje  
"DE SJRUËR" zeen.

De appel viltj neet ver vanne boom:

De zoon vanne slechter oet Ittervoort woeëj gaer get bie vurdeene. Dus bracht der de gezèt roondj. En zoeë as ut waal ins kan gebeure, wurdj der waal ins eemes eine daag vurgaete. Noe is dêt nog te vurgaeve, mer as dêt dèkker gebeurdj, den wil men zich hiej euver waal ins beklage. Zoeë auch eine trouwe laezer oet de Hunnissestraot. Hae haaj op eine daag (Donderdig) alweer gein gezèt. Hae beltj op nao de gezèt dêt der ut onghandj zat is. Dêt belle haaj sjienbaar waal geholpe, want binne ein half oor, haaj dae ontevreeje klantj ein gezèt inne bus.

Gelukkig dacht der en hae begos direkt oppe veurpagina te laeze. Mer nao twee regels dacht der waat gek, dêt noeëts dêt weit ich al allemaol. Toen der ins tegooj nao de datum keek, toen kwaam der tot de ontdekking dêt dêt de gezèt van maondjig waas. Dêt veel dus hieëlemaol neet in gooj aerd. Jè, Jè, spraak zien vrouw, toen der eindelijk oetgeraosdj waas, woeë zoeëj dêt jong ut toch van hubbe? Mer dêt wete wae auch neet. Mesjien môtte wae dêt ins vraoge aan Lellebel!!!!




\*\*\*\*\*


Volges Jos Van Lemme kriege lieëlikke aojers, de sjoenste wichter. Wae hubbe oos noe al lang aaf gevraagd, wie is dêt meugelik, dêt Nel en Jos zo'n leuke kinjer hubbe.



veur ein good advies en get lekkers, goatj den gauw noa DECKERS!



Zeetj gae eine door de wol geverfdje, goatj den veur eur bôlkes noa Wolboetiek "Boefie"



★ Siem...  
CORIEN!  
★ DRààààànk

## Eierbraojers:

Gae hubtj zoeë as djer witj herstebraojers en der zeen minse die nao eine aovendj stappe eier braoje. Zoeë auch nao de bontje aovendj van vurleeje jaor. Op de ieërste aovendj haaj men met vursjillendje artieste ongerein ein lekker eike genuttigdij Oh dêt môtte wae murge aovendj weer doon waerdje der gezagd. Gein probleem zag Theu de buuteman, gae kooomtj mer bie oosaete. Zaoterdig aovendj nao aafloop nog ein lekker glaas beer gedronke. En opins dao reep Sjeng, wae gaon sloeëte. Niks erg want wae hubbe toch honger zagte Peter en lange Edje, wae gaon lekker met Theu met Esther en Christian zoeëje auch vanne partiej zeen. Mer woeë waas Theu gebleeve? Gekeke gezoch, geine Theu. Dêt is niks erg zagte Esther en Cris, wae gaon nao zien hoes toe, want hae zal de koffie al waal aant zette zeen. Zie opweeg nao de Magnoliastraat Mer toen Peter en Edje boeëte kwoome zooge ze dêt Theu sluupendj richting kèrk ging. Noe zeen die twieë neet veur ein gaat te vange, dus zie der stiekum achteraan. Vanne eine verbazing vele ze inne anger, want inplaats dêt Theu rechts aaf sloog aan Hoover Kruus, leep der rechtdoor richting Buskes. Omdêt Theu dacht de met-aeters te hubbe aafgesjudj, leep der frank en vriej door, mer as der good geloesterdj haaj, den haaj der twieë knorrendje maage achter zich gehuurdj. Noe waas dêt toch mer effe te huire gewaesdj. De maedjes haaje ongertusse ut hoes van Theu bereiktj en stinge oppe deur te battere. Vanzelfspreakendj waerdje der neet oope gedaon. Naoveul geroop en gesjrieëuw hubbe ze de stried gestaaktj en zeen ze mer elders gaon aete. Theu lagge in zien vuustje, dêt hub ich hum good gefliktj dacht der. Mer groeëte sjrik sjoot hum inne bein wie dêt der de sleutel inne deur staak, dooke der plotsklap twieë figure naeve hum op. Gêr of neet hae heet dae aovendj de pan toch môtte opzette. Mejsien waal veur de laeste kieër. Want wae zeen der bang veur dêt Gerry de volgendje kieër, met de pan achter de deur steit te wachte.



nog neet gedèktj  
tege alle risico's?  
Knape verzekeringe  
wètj wal raad.




"Quasi Modo"

blijftj ope tot hae  
tege sloetestied de  
klokke geit loewe.

Waas eure fiets neet  
verzekerdj?

Goatj den ins kieke  
biej Albér.  
(unne angere Knape.)



Wie wiet is ut nao Westkapelle?

Misjien waetj gae ut al, mer de "Witte" vrieëtj. Dê't zal veur menig maedje oet oos dôrp waal gêt hêl angekoome zeen, mer dê't is ein hieël anger vurhaol. Omdê't ut de veurige zoomer, zonne gooje zomer waas, zag Eric tege zien geleefdje, schat stap in, den gaon wae ein paar dage nao zieë. Zoeë gezagdj, zoeë gedaon. Tandjebeurstel, ein stök zeip en ein paar ongerbookse inne auto gelaaje en richting Zieëlandj (Nae neet, woeë Pietje waas) Eric

is van zien zoeë huurdj ut laedje eigelik good oppe borde Dus inplaats dê't daal ein anger bleef hae mer dê't hae ut bord Haag, te wiet jong spraak der, den mer is toenmer weer aaf Roosendaal en zoeë gehobbeldj. Mer toen waas, haaj der waal al vurreeje.



dae gans kepot maedje en auch, dae neet zoeë langs de weeg der in Roosenroute insloog doorrieje. Tot ondekde Den te wiet jong, gedreidj jong. Hae gedwaaldj richting op Westkakelle aan der eindelijk dao inmiddels 650 km

Weem zag oeëts dê't liefde blindj is????????? Volges Eric, is dê't ein waarheid as ein koe!!!

\*\*\*\*\*

Wis djer al.....

- Dê't de prins zich aafgeloupe vastelaovendj met kaersleegt heet moote wasse.
- Dê't HooverSjaak neet inne berg op vekantie mô't gaon, want den brikdj djer drek ziene pols.
- Dê't Patric ziene ieërste luchtdoup auch good doorstange heet.



Gevraagdj:


Gooje hondj gevraagdj, hoeftj neet persee te waake. As der Berend Jan mer wakker maaktj as wae Gaste hubbe! Aan te beeje oppe Meidoornstraot!!!!



\*\*\*\*\*

Wath is one name???

Hiej in oos dôrp hubbe wae al jaore ut gezellige dôrpssjuttersfieëst. As zestal moste den auch eine naam hubbe. Zoeë is der ein zestal dê't numtj zich de Herstebroajers. Leuk. Mer in Ittervoort dao hubbe ze auch zôn gezellig sjuttersfieëst georganiseerdj. Om dê't eine inwoeëner oet oos dôrp, eine zoon heet woeëne in dê't buurtdôrp, waardje onger genot van ein pilske beslote wae vorme ein zestal, en onger aanveuring van Peter gaon wae in Ittervoort sjeete. Mer noeë nog eine naam. Omdê't de vader van Peter hiej in Ell auch



met sjuutj biej de "Herstebroajers, vooj hae, dê't auch dae naam in Ittervoort gebroeëktj kost waere. Zoeë gezagtj, zoeë gedaon. Mer oeijoei eine angere Herstebroajer haaj men neet gevraagdj om met te sjeete in Ittervoort. Dê't veel dus al vurkieërdj,

en toen der auch nog tot de ontdèkking kwaam dê't ze de naam Herstebroajers gebroeëkdje, toen sloog de vlam hieëlemaol inne herstegan. Volges huuëre zêgge, numme de zes sjutters van Ell zich op ut volgendje dôrpssjutterfleëst

"De Aangebrouje Herstebroajers"



Eur kiekjes groeët of  
klein bie John zeen ze  
allemaol aeve fein.



Veur al eur teget-, grondj-  
kinker- en sierwerk  
nao Wim

Vörs van 't béd,  
ein lekker paddesteulke  
van Jo of Lowie .....




Wim djer al....

Dät Thieu vanne Slechter oete cefee is?  
Dät Siem vanne Kaolder noe inne Bachelorclub zitj?  
Dät der kwaoj tonge woore, diej zagte toen Siem  
Cefee begos, "Der zal waal ein paar kieër  
koome op te hange "Wegens concert geslote."  
Dät dët allemaol reuze metviltj.....  
Dät der in Ell auch ein Geite club besteit.  
Dät diej club 99 lede heet en ein geit.  
Dät dët neet hieëlemaol waar is.  
Dät ut zeer deskundige luuj woore diej die geit  
zeen gaon koupe.  
Dät ze toen de bekindje kat inne zak hōbbe gekochtj.  
Dät wie ze de geit in mei kochte, der nao twee  
maondj al twee bōkskes en ein geitje bie haaje  
Dät bie gelegenheid vanne bliej gebeurtenis eeder  
driej besjuute met muuskes kreeg.  
Dät diej zelfdje geite club ein baechparty heet  
gegeave.  
Dät diej reclame maakdje met moddergevechte door  
bloeëte dames.  
Dät diej moddergevechte niks oom ut lieëf haaje.  
Dät der minse zeen diej zich aafvraoge of men ze  
in Ell aaf en toe zuut vleege.  
Dät veur dët vleege ut K.V.W. gezeurgdj heet.  
Dät ut K.V.W. de kinjer ein geweldige vaak bezeurgdj  
heet.  
Dät ze alle sjoeëlgaondje jeugd. Zuid Limburg van  
oet de locht heet laote zeen.  
Dät ze bie hun jubileum de minse ein geweljjig  
fieëst hōbbe aangebooje.  
Dät dët gepaardj ging, met ein luchtsjoov en  
oeëte kerktoore springe.  
Dät ze auch nog ein circus opveurdje gehieël  
gespeuldj door leiding en aod leiding.  
Dät gae kintj zeen woë ein klein dōrp erg  
groeët in kan zeen.  
Dät as ut zoeë doorgeit, gein klein dōrp bleeftj.  
Dät der ut afgeloupe jaor hieël veul kindjes  
geboore zeen.....



Veur ei  
sjoëën bleumke  
of plentje  
nao Verhaag !

Hoie hè



Veur ein lekker wörsje, lepke  
of sjiefke, nao  
ôze slechter.....

Zwarte Veut:

Der waas ins eine man dae last haaj van neer-  
stein. Vanne dokter kreeg der de raod, veul  
drinke menieër en ut beste is pils. Dae man  
mien veurkeur veur beer kinnendje, hubbe wae  
oos al aafgevraagd, wie kumtj zônne man noeë  
aan neerstein? Mer dit terzieje.

Ondanks ut veule drinke, haaj hae  
biej tied en wiele toch nog eine  
hevige aanval. Hae wurdtj doorvur-  
wezen nao de spesjaalist in ut  
zekehoeës te Remunj. Operere, dêt  
waas de oplossing. Mêr dêt hoofdje  
neet opslaag. Mog menieër weer  
eine aanval kriege, den most der  
mer geliek koome en den ging der onger ut mes.  
Op eine daag toen der biejen zien aojers (die  
toevallig in Remunj woëne) inne hoof aant werk  
waas, toen kreeg der mich toch ein pien.  
Inne auto gestaptj en mer snel opweeg nao ut  
hospitaal. Dao angekoome, zag de dokter, kleidjtj  
uch mêr ins oet, den zulle wae uch van diej  
stein vurlosse. Toen spraak ut lijdendj veurwerp  
tot eeders verbazing de volgendje weurd.  
"Dokter dêt geit neet, ich môt ieërst nao hoeës,  
want ich hub mien veut neet gewasse!"  
Of die veut nog steeds neet gewasse zeen, wete  
wae neet, want dae man luptj nog steeds hiej  
in Ell rondj MET neerstein.



\*\*\*\*\*

De vroeëtzeendje Vader:

Jozee van Miet is auch vader gewoore van eine  
zoon, en waal op 3 januari. Ut kindje is geboore  
int zekehoeës. Toen Elly met de kleine nao  
hoeës mocht, huurdje ze tot heur groeëte sjrik,  
Zee tot de zuster zêgge, "Bedanktj veur de gooj  
zurg en tot op ut intj van ut jaor." "Waat is dêt  
veur gekheid," zeet ze. Jé, kreeg ze as antjwoord,  
wae zeen van diej gelukkige minse, die twieë  
kieër per jaor mamma en pappa kinne waere, noeë  
en op ut inj vant jaor. Zoeëj Elly dao zoeë ge-  
lukkig met zeen?

\*\*\*\*\*



## Smakelik Aete:

Zoon ver vurhoeësdj van Ell nao Kelpen.  
Zoon geit gaer opstap in Ell.  
Zoon drinktj sooms waal veul te veul beer.  
Zoon wurdj aangehaoje door de peliesie.  
Gelukkig niks aane handj. Zoon wiltj zoëe as  
eeder jaor doorhaoje bie de Bachelorclub.  
Mer as bezeugdje moeder, zeet ze tege heure  
zoon, kom den mer hiej slaope, den hoofste  
neet op ein putje beer te kieke. Zoon bliej want  
hae mocht allein opstap. Vriendin most waerke.  
Zoon kumtj oom half vief smurges bie de aojer-  
likke wuuning. Moeder haaj aodjaors daag de  
knien al gebraoje, veur noeëjaorsdaag. Dêet waas  
heur gemeakelik, den hoofdje ze noeëjaorsdaag  
neet zoëe lang inne keuke te staon. Haaj ze ge-  
dacht. Toen moeder smurges opsting, toen dacht  
ze waat raar, steit mich dao de pan met de knien  
op ut fornuis. Zie de deksel opgehufstj, wêg knien  
Zoon haaj zich veur der zich te ruste haaj gelag  
te good gedaon aan dae knien.  
Moeder bliej, dêet ze zoëe mer eine zoon heet.

\*\*\*\*\*



Wis djer al...

- Dêet Ut vurhaol van tweeë jaor geene nog steeds kloptj.
- Dêet Theo van Gerris toch met geit, auch al heet der geine taxi besteldj.
- Dêet de knien bie Wiel van Toom ut good doon, want ze hubbe de peulkes vanne processie onger heur koeëj staon.
- Dêet Siem wie der al effe inne cefeë zoot, nog dèk tege Corine zag; Haoje ich gaon effe nao Tjeu.



asdjer deenktj:  
"Det hōbbe ze neet"  
goatj den toch mer  
effe noa

Jan en Mia Govaerts.



VEUR VEUL geluid  
en good leecht  
nao Hub

de zale-accommedatie van

Nol en Ietje,  
veur eine gezellige  
pot beer, ein fieëst  
of vergadering.



## De Broeëloft en ut Hoonjsvoor:

Wiel en zien vrouw ging ins op eine zaoterdig-aovendj nao ein viefentwintjig jaorige broeëloft in Ittervoort. Het waas ein Bèr gezellige broeëloft, mèt veul drank en specerijen.

Dèt môt oos Wiel net hubbe. Ze ginge door tot laat inne aovendj of vreug inne meurge of wie se dèt auch numme wilt. Zien vrouw haaj al dèk gezagt: "koom Wiel laot oos noeë mêr gaon." Mer as Wiel zitj den zitj der vast en is hae met gein paerd nao hoeës te kriege. Mer wie ut laot genoeg waas, en niks mieër kreeg en nog gêt hongere haaj, ging der mer biejer anger minse aete. Dao biejer Pierke aangekoome, zaat ut hoeës al good vol, met minse die heure boeëk auch nog neet vol haaje.

Hie tusse leep auch eine sjoene veerpoeëtige broeëne duitse herder roondj. Dao waardje nog get vleis gebraoje en koffie gedroonke. Mer Wiel zitj al dageliks in ut

vleis en daoroom geuftj der zien stök vleis aane hoondj. As dank veur dèt lekker vleis, gaaf de hoondj zien brökke aan Wiel. Wiel dae heet nog gêt geblaftj, mer achter-aaf waas ut toch ein gezellige broeëloft.



Wis djer al...

- Dèt Neer van Doeër auch ein geite club heet wille beginne.
- Dèt ðer afgeloupe zomer mèt zien geit door Ell leep oom leje te werve. Mer dèt is niks gewoore.
- Dèt Wim vanne Geut waal ein geite club heet opgerichtj.
- Dèt Die club besteit oeët tweeë leje en ein geit.


## Paus bezoek In Ell:

Op Annelies hure vurjaordag, waardje nog hieël laat, zoeë inne kleine eurkes aangebeldj. Ze duuit oope, en dao steit veur heur, eine neet al te groeëte man. Hae spriktj gêt onvurstaonbaars, hae kustj de grondj, men hulptj hum eaver-inj. Hae zaktj weer ter aarde, en kustj weer de grondj. Nao hum weer oppe bein geholpe te hubbe, spriktj der nog inkele onvutsaonbare weurd en vurdwientj richting Seringe straot. Hae heet nao ut bezoek aane Antoniusstraot nog vursjillendje kieëre de straote en stoepe van Ell gekustj. Mer meistal gebeurdj dit inne nachtelikke oore, zoeëdèt mer weinig minse van dit sjoen gebeure getuuige kinne zeen. Toch waal jaomer Jantje!

\*\*\*\*\*

## Ufoos:

De Belsje diej haaje auch weer ge Disco leegt zooge ze veur eine ufoo aan. Dèt kwaam dus inne gezèt. Mer de daag daonao ut inne gezèt sting, wist ein vrouw te vurtelle, dèt ze der auch eine gezeen haaj oppe Hoeëgstraot. Neet eine kieër mer al ein paar daage. Wae as redaksie, wae dachte dao gaon wae opaaf, want dèt is noeëts. Mer dèt waas toch neet gans waor. Want woeë dèt leegt vanaaf kwaam, dao hubbe wae veurig jaor auch al eaver gesjreeve. Ut waas namelijk de televisiemast van Pietje vanne werktuige. Dae haaj boove op dèt gevaarte ein sjoen kerstster gezatte. En dèt gaaf inderdaad ein zieë van leegt. Wae dinke dèt ze dèt auch in Belsj hubbe kinne zeen. en dèt men dao weer geallarmeerdj is gewaest! Pietje, noeë môste ut volgendje jaor mer weer gêt anges met dèt dink anvange. Want den leeftj ut in ut noeëts.



\*\*\*\*\*






Veur ein verzekering,  
ein reis, geldj teveul  
of nuedig veur ein bank,  
na de BANK.

Wildjer get poote veur  
de seer....  
den na Sjra of  
Linders heir.....



veur get sappigs  
NAO MOORS EN  
KOPPEN



HELP HELP HELP!!!!!!!


Ein kasteleinsvrouw oet Ell, neet Anja, neet  
Corine, neet Mia, neet Thea. Mer diej anger,  
diej ging ins nao de stad Wieërt. Begindj al  
good hé! Meug vant winkele en ut geldj oet  
gaeve, ging ze mer nao eine Lunchroom. Ze  
trakteerdje zich zelf on ein of twee teskes  
koffie en ein groeët  
gebakje haaj ze waal  
ze haaj die waek  
krece omdêet ze zoeë  
gevalle. Ze is bie j  
motj gër weete. Mer  
geleuter kriegste  
Dus mer effe nao de  
nao hoeës. Ze zit  
dames, en zoeë as ut  
netjes gesloote.  
omhoeëg, doortrekke deur  
Ja daag, niks deur ope, dao  
Gekloptj, geroope, en eindelijk  
inne zaak der achter dêt  
sloote zaat. De baas vanne  
met meuje en zag: Mevrouw,  
wae hubbe dêt zoeë geklaordj.  
Dêt zoeë dêt waas drij  
de deur mer oete sjarneere  
Veurluipig duuit Idy gein  
slot! En den zeen der auch  
beweere dêt ze auch nog  
aafvalle heet môtte inlevere.  
wae niks van. Want volges  
nog ins zoeë mager, dêt ze  
heet om boekpjen te kriege.



gebakje. Dêt  
vurdeendj, want  
ein lintje ge-  
good waas aaf  
de dieetclub  
jé van al dêt  
hoeëge noeë  
W.C. en den  
mich dao oppe  
huurdj de deur  
Klaor, books  
ope en wegweeze.  
Ietje, waat noeë

Noeë ins neet, wist gae.....

Mer wam waetj woeë Thijs vanne Bekker waas  
vanaaf aodjaors avendj nege oor tot noeëjaors  
avendj zeve oor???????





De jongere bie j Siem , die j dachte, bie j Nol ein geiteclub, den moote wae gêt anders hubbe, den allein die moters. Dêt anders haaje ze gauw gevonje. Laot mich dae Rik toch eine ezel hubbe en dae waerdje sunjes veur de bachelorclub niergezatj.

Nogê steltj ein geiteclub gein bal veur, mer ein ezelclub?

\*\*\*\*\*

Bloome veur eine Wielrenner:

Huubke ging met fietse, van Luxemburg trök nao Valkeswieërt. Dêt zeen zon 255 kilomaeter. Leny die haaj geteldj, ze rieje zoeëveul kilomaeter per oor, dus de zeen ze oom ongevieër zoeë laat weer trök in Valkeswieërt, asse zoeë laat gestartj zeen. As leefhubbendje echtgenoëet, kocht ze eine groeëte bos bloome, daomet toog ze op Valkeswieërt aan. Ze haaj al ein oor gewachtj, mer nog geine Huub..Nog ein oor mer al wie, der kwaam geine Huubke. Leny waerdje alsmer ongerustdjer, der zal toch niks gebeurdj zeen vroeg ze zich aaf.



Ich zal ins gaon belle, dacht ze bij der eige. Zoeë gedachtj, zoeë gedaon. Waat wae der noeë loos met dae renner?

Dae haaj zoeë hel gefietstj, dêt der al gewasse en gestreke al innige oore oppe bank thoeës laag te slaope. Dêt waas nog ins ein prestatie, waat hae dao gefliktj haaj. Dêt Huub eine doorduurjer, is dêt waetj eederein nog van oet zien voetbal-carrière. Mer of dêt Leny hum nog ins zal vurwelkome met bloome, dêt vurteltj ut vurhaol neet

Vurbouwing:

Eine boor dae haaj gaer get aan-en vurbouwdj aan zien farm. Dus hae ein teikening laote make en die ingedeendj op ut gemeindje hoes. Mer zoeë as eederein waedtj, de gemeindje meules dreije langzaam. En daobie zeen ze op ut gemeindjehoes auch nogal pietleutig. Toen dêt get te lang nao de zin vanne desbetreffendje deurdje, toen ging der zelf mer ins informere wie dêt zaat. Hae kriegtj te huuire, dit is nog neet in orde en dêt mot nog anders. Dus de man dae wurdtj good korrelig, waat auch zien good recht is. Mer waat gebeurdj der, hae zitj nog bie de ambtenaar die zien zaak behanjeldj of deze wurdj efkes weg geroope. De getergdje bouw ongernummer dae zaag toen zien kans. Hae sjerdje al de pepeere en teikeninge bie ein, en hae spurtj richting hoeës-waars. Dêt ze ut mer bekieke zag der tege zien vrouw, ich hub mien besjeije trök en ich doon zoeë as ich dêt wil. Mer dae vlieger dae ging neet op, want de peliesie waas zoeë aane deur. De gooje man is nog efkes kinne vluchte, mer toen waerdje der van zien bed gelichtj. Hae heet eine nacht gratis logies gekrege. Mer of dao ontbijt bie waas? Mer veur de gerustjstelling, de boorderiej is sjoëen vurbouwdj en de stalle zeen auch sjoëen gewoore.



\*\*\*\*\*

- Wis djer al.....
- Dêt Albér zien good se vies metgeuftj aane rommelmertj, om dêt zelfdje se vies oppe mertj weer trök te kinne koupe.
- Dêt Wiel bie die vrouw van Wieërt al drie kieër, ut leste nummerke heet gemaaktj bie ut kiene.
- Dêt Siem met ut KVV fieëst nuuidig nao de paresjute most gaon kieke.
- Dêt Thjeu van Linders toen veur ein geslote deur kwaam.
- Dêt de biljaarclub wacht op nog ein vol envelop.



VEUR EIN STERK  
DRENKSKE OF PILSKE  
SLIETERIE 'BACCHUS'

VEUR EURE DAGELIKSE  
BOEËDSJAPPE  
NAO FRANS + NELLIE



aan ein beurtje  
toe?  
Sjoeën, den nao  
schoonheidssalon Sandra.

Vurkieërdj vurboonje:


Matje zaat bie Siem aane tap. Dao geit de telefoon  
Oh wacht mer zeet Mat, ich num waal op. Dus hae  
paktj de telefoon en zeet, met Slagerij Heykers.  
Ann de angere kantj waerdje gezagt, Oh pardon  
den bin ich vurkieërd vurboonje. Siem dae keek  
al op en zeet wie kumpste dao noe bie? Grapje  
zeet Mat, mer neet erg, dae beltj dadelik waal  
trök. Hae haaj ut nog neet oetgesprooke, of  
ringggg, beltj de telefoon. Mat paktj weer op  
en waat zeet dae flap, U spreek met de buurman  
van Slagery Heykers! Efkes stil aane angere kantj.  
en dao waerdje weer gezagtj, mer den bin ich  
weer vurkieërdj vurboonje. Weem motj gea den hubbe  
vreugtj Mat hieël serieus. De Bachelorclub waerdje  
gezagt. Oh, den mot gae 1595 belle antwoordje Mat.  
Nieërgelagd en nog gein minuut later, telefoon.  
Mat grieptj veur de derdje kieër  
nao de haok en zeet tot Siem zien  
vurbazing: En noeë spraektj gae  
met dae angere buurman van  
Slagery Heykers. Noe is dae op-  
beller geine al te snuggere  
persoeën gewaest, want hae  
vurontsjuldigdje zich veur de  
derdje kieër Mer hae heet toch geine veerdje  
kieër mieër durve te belle, want dae daag heet  
bie Siem de telefoon neet mieër gerinkeldj.



~~~~~

Televisie Sterre:

Nao wae vurnoome hubbe, zeen Tina Turner en David  
Bowie veur de televisie gevraagdj.  
Heur veurkeur geit oet nao de Tros.  
Want dêt is de omroop, diej de meiste herhalinge  
oetzendj.



CARNA VAL

Höbtj djer get te veere en haodjt djer van ein  
goed stök stummingsmeziek, bel den 1233.  
Accordeon duo "Lange Janos en kleine Nolljos."  
Met zang van Ida de la Bonanza.




\*\*\*\*\*

Te koup: Opblaasbare stoeipop. Slechs eine kieer  
gebroektj oppe bontje aovendj '89.  
Te bevrage bie j Ron van Miet vanne  
Bekker.



\*\*\*\*\*

Teves te koup weg es slecht sezoeën: Keugels veur  
sjeetbuks. Inlichtinge sjutteriej Sint Sebastianus.



\*\*\*\*\*

Oet ut bovestaondje bericht trêkke wae de kon-  
klusie, dêt de sjutteriej dus dit jaor "weer neet"  
de aoje limburgse hoofjt te organisere.

\*\*\*\*\*

As ut op aswoonsdig net zoeë drök inne kêrk is  
om ein assekruuske te hoole, as inne cefées om  
hieering te aete, den kwom menieër pestoeër  
kiloos as te kort.

\*\*\*\*\*



Haakster Coeëba gong op vekantie. Op ut kiene  
waardje gevraagdjt woeë Coeëba waal haer waas?  
Lies wis ut haorgenouw te vurtelle. Ze waas nao  
de "Agrarische Eilande!" Mer volgus anger berichte  
zaat ze op ein eilandj dêt met kenaries te make  
haaj.

\*\*\*\*\*